

1282-1282- OFP - Acta Capitulum Generalium apud Viennam Celebrati

In nomine patris et filii et spiritus sancti. Amen.

Acta capituli generalis apud Viennam in
Theotonia celebrati anno Domini · M^o ·
CC^o · LXXXII^o ·

Confirmamus has constitutiones. In capitulo de domibus concedendis. ubi dicitur. absque priore et doctore non mittatur. addatur. nec postquam missus fuerit. dictus fratrum numerus minuatur. et si aliquis inde extractus fuerit; loco illius alius assignetur. Et hec habet · iii · capitula.

Item hanc. In eodem capitulo. circa principium ubi dicitur. nisi predicti viderint expedire. addatur. fratres autem novis domibus deputati. conventibus de quibus assumuntur. et ipsi conventus eisdem quantum ad suffragia. sicut suis conventualibus; mutuo teneantur. quousque conventus ibidem fuerit assignatus. quantum vero ad omnia alia dicti fratres ad domos predictas simpliciter pertinebunt. Et hec habet · iii · capitula.

Item hanc. In capitulo de studentibus. ubi dicitur. cum frater de provincia ad provinciam mittitur ad regendum. deleatur totum usque ibi. circa eos qui student. et dicatur sic. cum frater de provincia ad provinciam mittitur. si simpliciter illi provincie ad quam mittitur assignetur; libri et alia que habet per provisionem ordinis a provincia de qua mittitur. vel eciam a conventu; ad eandem provinciam vel conventum simpliciter pertinebunt. alia vero que habuit. sint illius provincie ad quam mittitur; ubicumque postquam assignatus fuerit. moriatur. Si vero ad tempus mittitur; omnes libri eius et res alie post eius obitum ad conventum. unde assumptus est. pertinebunt. in utroque autem casu. sive assignetur simpliciter sive ad tempus; conventus. cui assignatus fuerit. et ipse eidem conventui; ad suffragia teneatur. Si autem ex quo alteri provincie assignatus fuerit. ipsum mori contigerit. antequam certo conventui deputetur; prior provincialis illius provincie. eidem provideat de conventu. qui sibi ad suffragia teneatur; ne consuetis defunctorum subsidiis defraudetur. Et hec habet · iii · capitula.

Item hanc. In capitulo de electione prioris conventualis. ubi dicitur. si vero de alia fuerit provincia. postquam per annum. addatur. continuum a tempore sue assignacionis immediate precedente electionem faciendam. Et hec habet · iii · capitula.

Iste sunt approbaciones.

Approbamus has. In capitulo de electione diffinitorum provincialis et generalis capituli. ubi dicitur. maior numerus possit inveniri. addatur. predicti igitur · iiiior · diffinitores eligantur in die proxima precedente diem assignacionis capituli. et ex tunc incipiat auctoritas eorumdem. Et hec habet · ii · capitula.

Item hanc. In capitulo de apostatis. ubi dicitur. secundum quod sue discrecioni visum fuerit vel placitum. addatur. apostate unius conventus non recipiantur a priore alterius conventus ad ordinem in eadem provincia. sine licencia prioris provincialis. nec apostate aliarum provinciarum recipiantur in aliis provinciis sine licencia magistri ordinis. Et hec habet · ii · capitula.

Item hanc. Cum ex multis causis nobis insinuat videatur nobis. quod conventus Caminensis etc. Et hec habet · ii · capitula.

Item hanc. In capitulo de capitulo provinciali. ubi dicitur. eius excessum referant ad capitulum scripto communiter sigillato. addatur sic. singulis annis. auditis culpis. in capitulo provinciali fiat secretum scrutinium in conspectu omnium super retencione vel absolucione prioris provincialis cum expressione nominum et officiorum fratrum vota sua exprimentium. per diffinitores capituli provincialis. quod scrutinium non publicetur vel alicui ostendatur. sed statim sigillis omnium diffinitorum in conspectu omnium sigilletur. et per diffinitorem generalis capituli. vel eius socium. vel per socium prioris provincialis in anno provincialium; ad generale capitulum deferatur. Et hec eadem forma scrutini facienda de priore conventuali per subpriorem vel eius vicarium in absentia subprioris et duos antiquiores in ordine de conventu. presentes in capitulo. in tractatu eorum. que mittenda sunt ad capitulum. observetur; et sigillo conventus ipsum scrutinium sigilletur. et per socium prioris ad capitulum provinciale transmittatur. dictis [autem] scrutatoribus voluntatum. in virtute obediencie precipimus. quod ipsum scrutinium alicui per modum [aliquem] non revelent. Et hec habet · ii · capitula.

Iste sunt inchoaciones.

Inchoamus has. In capitulo de capitulo provinciali. ubi dicitur. infra vero idem tempus. deleatur. idem tempus. et dicatur. quinquennium ab ingressu ordinis fratres alii etc.

Item hanc. In capitulo de visitoribus. ubi dicitur. priores autem vel lectores. addatur. et subpriores.

Item hanc. In capitulo de electione prioris provincialis. ubi dicitur. hoc excepto. quod eos includi sicut in electione magistri non oportet. addatur. tres autem priores conventuales. qui primitus habitum nostri ordinis susceperunt; disquirant et recipiant vota fratrum.

Item hanc. In capitulo de capitulo provinciali. ubi dicitur. predicatorum autem generales dicimus. qui per priores provinciales et diffinitores provincialis capituli fuerint instituti. addatur. quos instituendi nullus

vicarius. etiam cum diffinitoribus; habeat potestatem. dicti autem predicatoribus dicto officio non fungantur; nisi in provincia in qua fuerint instituti.

Item hanc. In capitulo de studentibus. ubi dicitur · iiiior · autem provincie scilicet. Provincia. Lombardia. Theotonia. Anglia. deleatur totum usque ibi. provideant. et dicatur sic. singule autem provincie. exceptis duabus. scilicet. Grecie et Terre sancte. provideant etc.

Item hanc. In eodem capitulo. ubi dicitur. teneantur providere. videlicet. in bibliotheca. ystoriis et sententiis. addatur. et vestitu.

Item hanc. In capitulo de recipiendis. ubi dicitur. nec conventus aliquis recipiat aliquem conversum sine licencia prioris provincialis. addatur. nec receptus fiat clericus sine licencia magistri ordinis speciali.

Item hanc. In capitulo de electione diffinitorum generalis et provincialis capituli. in fine ubi dicitur. idem dicimus de diffinitore capituli generalis. addatur. et socio prioris provincialis euntis ad capitulum provinciale vel generale.

Item. Ubi cumque fit mencio de confessione generali in officio ecclesiastico. ubi dicitur. confiteor deo et beate Marie. addatur. et beato Dominico.

Hee sunt admoniciones.

Cum privilegium mereatur amittere. qui commissa sibi abutitur potestate; ordinamus et volumus et mandamus et districte iniungimus prioribus provincialibus et diffinitoribus capitulorum provincialium. ut in committenda auctoritate predicandi. et confessiones audiendi; formam a summo pontifice traditam exacta diligencia studeant observare. Caveant autem. ne dictam auctoritatem committant notabiliter multis. illi vero quibus commissa fuerit auctoritas memorata. de casibus a iure ordinariis reservatis; se nullatenus intromittant. nec etiam de casibus. quos prefati ordinarii sibi duxerint reservandos; nisi de eorum beneplacito et assensu.

Item. Etiam fratres diligenter et efficaciter. secundum datam eis a domino gratiam. illos qui sibi confessi fuerint exhortentur. ut saltem semel in anno suis presbiteris parochialibus confiteantur. prout statuit concilium generale. et summus pontifex ordinavit. Quamvis etiam a sede apostolica predicandi sibi sit concessa potestas. ob reverenciam ordinariorum et rectorum ecclesiarum parochialium. et pacem cum eis habendam; volumus. quod prohibentibus ordinariis vel etiam rectoribus. ne in sua ecclesia predicent; a predicacione desistant.

Item. Cum ex favore prelatorum et clericorum tam in spiritualibus quam temporalibus ordini multum accrescat. iniungimus fratribus universis. ut ab eorum offensis caveant. sententias rite per eos latas observent. et interdum laycos moneant. ut que sibi iure debentur; persolvant. et per reverenciam. humilitatem. ac familiaritatem captare studeant; gratiam eorumdem.

Item. Cum quilibet frater teneatur utilitatem ordinis procurare. monemus ut in electionibus. scrutiniis. et tractatibus eorum que ad generale vel provinciale capitulum sunt mittenda; non renuncient voci sue.

Item. Studentes studiis deputati; studio diligenter intendant et a familiaritatibus et discursibus et occupationibus superfluis; arceantur.

Item. Cum studentes tam alienigene quam indigene. non sint ad imparia iudicandi; monemus priores provinciales et conventuales. in quorum provinciis et conventibus generalia studia vigent. ut tam in necessariis exhibendis. quam in aliis ad consolacionem eorum spectantibus. extraneos sicut et suos; caritative pertractent. et faciant ab aliis pertractari.

Item. Cum per ordinarios potius quam per vicarios. que agenda incumbunt. consueverint consulcius ordinari; volumus et monemus. ut gerentes vices prioris provincialis. provincialatu vacante; non sint faciles ad absolvendum priores et ad transferendum fratres de conventu ad conventum; nisi ex legitima et rationabili causa. vel nisi de consilio diffinitorum. quando eis contigerit provinciale capitulum celebrare.

Item. Magister ordinis de diffinitorum ordinatione. consilio et assensu. districte interdicat prioribus provincialibus et diffinitoribus capitulorum provincialium. ne scrutinia priorum eis oblata. nec secreta eis in diffinitione relata. nec alia occulta ad diffinitionem spectantia; aliis personis revelent. ex quibus possit scandalum vel turbacio exoriri.

Item. Cum ex divisione aliorum limitum inter provincias. conventus et fratres. consueverit turbacio generari; magister ordinis. de diffinitorum ordinatione consilio et assensu. districte iniungit prioribus provincialibus et conventualibus ac ceteris fratribus. ut limitaciones factas inter provinciam et provinciam. studeant exacta diligencia; observare. et fratres. qui contrarium fecerint. pene gravis culpe subiaceant. et quicquid quesierint infra limites alterius provincie conventibus. in quorum preiudicium hoc fecerint; absque dilacione restituere teneantur.

Item. Prohibemus districtius. quod nullus conversus fiat clericus sine licencia magistri ordinis speciali. Ista sunt suffragia.

Pro domino papa et statu universalis ecclesie; quilibet sacerdos · vi · missas. et quilibet conventus · vi ·

Pro domino Hostiensi; quilibet sacerdos · ii · missas de beata virgine. et quilibet conventus · ii · missas l.

Pro venerabili collegio cardinalium; quilibet sacerdos · iii · missas. Pro domino G. cardinali defuncto; quilibet sacerdos · iii · missas [pro Guilelmo de Bario † 1282 apr. 29].

Pro domino Ludovico quondam rege Francie. et predecessoribus suis. pro domino Ernardo primogenito regis Castelle. comitissa Flandrie. domina Anna filia regis. Agnete sorore regis Boemie; quilibet sacerdos · ii · missas.

Pro qualibet missa superius posita; clerici · vii · psalmos cum letania. conversi · c · pater noster.

Committimus magistro ordinis ordinationem studiorum generalium. ut ipse de magistris et bacallariis ordinet et disponat. prout generali utilitati ordinis et profectui fratrum; viderit expedire.

Concedimus Romane provincie · ii · domos. unam ponendam in civitate Theatina. aliam in Thuscia. provincie Theotonie; · iii · provincie Anglie; · ii · provincie Ungarie; · ii ·

Et ponantur omnes. ubi prioribus provincialibus et diffinitoribus capitulorum videbitur expedire. nec situentur in locis. ex quorum vicinitate possit aliis provinciis preiudicium generari.

Absolvimus priores provinciales Ungarie; et Anglie.

Absolvimus priores conventuales Susatensem. Nove civitatis. Soldinensem. Amburgensem. Strasburgensem. Frisacensem. Basiliensem. Ciemensem. Treverensem. Bernensem. Pasvalcensem. Prinslaviensem; Sesecensem (?). nec hac vice resumantur ad eadem officia; in eisdem provinciis vel conventibus.

Omnibus fratribus. qui in conventu Pasvalcensi litteras vicarie a vicario acceperunt et detinuerunt. vel de quorum consilio et assensu illud est factum. iniungimus · xv · dies in pane et aqua. et sedeant in terra. et totidem recipiant disciplinas et totidem dicant letanias. et privamus eos omni voce. nisi in sui accusatione; donec restituti fuerint per magistrum ordinis vel capitulum generale.

Omnibus prioribus qui remanserunt de capitulo sine licencia nec se legitime excusaverunt; iniungimus · vi · dies in pane et aqua. et totidem recipiant disciplinas.

Volumus eciam et iniungimus. quod diffinitores presentis capituli et futuri honeste deducantur; de conventu ad conventum.

Sentencias iudicum approbamus.

Sequens generale capitulum assignamus apud Montempessulanum; in provincia Provincie. diffinitores autem sint ibi; dominica infra octavas ascensionis domini.

Actis additae sunt litterae magistri ordinis; cf. app. n. XXXIV.